

# DOMINI SYMPHORIANI CAMPE-

GII, EQVITIS AVRATI, ET CLARISSIMI LO-  
tharingiæ Ducis Antonij primarij medici, in historias ex omni-  
bus Galeni libris à se recenter excerptas, ad præclarissimū  
uirum dominū THOMAM CAMPEGIVM Bo-  
noniensem, Apostolicæ sedis Protonota-  
rium dignissimum, Præfatio.



Alexander  
Benedictus

PLERISQVE sepe rogatus sum, ut Galeni historiales cam-  
pos, quos sanè multos hæcenus sparsim scripsi, in unū collige-  
rem, & officiosa impressorū manu atq; industria ea omnia antè  
recognita, accurateq; digesta, cōmunia pluribus redderē. Ne-  
gociū meū aliquando cogitans hæsi, distuli, tor sicq; me etiā: ea  
enim erant partim ita dispersa, ut receptui classico nullo quidē  
signo ad uexilla reuocari amplius facile possent. Partim etiā in  
discipulorum manibus habebantur per Gallia totius diuersa gymnasia, partim cæ-  
cis nostræ bibliothecæ angulis, situ ac puluere penè tabescentia diu iacuerant, pro-  
cul à mente, omniq; memoria: ut difficilissimū sanè mihi uideretur, in corpus aliquod  
unum tot membra dissecta componere. Meas cogitationes quoq; non magno stu-  
dio lucubratas, satis placere posse diffidebam, ijs præsertim, qui stricta libella omnia  
appendunt, & corrugata fronte ac rhinoceroteo naso aliena tanquā odorant. At-  
que ideo interim cœpi in lucem emittere De claris medicis librum, prætentaturum  
iter, qui impressoria arte diffusus in plurimos, à multis probatus, atque ut ipse uidi  
digne habitus est: cui clarum præter cæteros testimonium dedit ALEXANDER  
BENEDICTVS ille noster: ille inquam, qui singulari doctrina, & accurata de re  
quaq; ratione, græcarum præterea literarū eruditione, ætatis & seculi nostri nemi-  
ni cedit: ea una epistola ad nos in Galliam, quæ ad philosophiæ Platoniciæ caput ap-  
posita, ueluti serenissima gemma fulget & emicat. Hinc incensa mihi fiducia, ut cæ-  
tera ista quæ diximus ita sparsa quoquoersum ac disseminata, in unū cogere-  
mus. Quod cum fecerimus, quæ ex multis deperditis inuenta receptaq;  
sunt (quæ sanè Galeni historiales, à Campegiorum cognomine  
Campos appellandas duximus) tuo amplissimo nomini  
meritò dedicanda putauimus. Fruere igi-  
tur, & me uicissim ama.